

卒哭前專廢講業似未妥當會講朝講雖不可為常時開筵不可久停而前受大學小學實與禮經無異來月為始開筵何如師傳之意如此敢啓 從之○戶曹請下諭諸道監司督送今年應納田稅作米貢物收木以為推移補用於接待之地 從之○延平府院君李貴上劄略曰今日之喪乃歷代所未有之變禮大臣禮官雖已稟定而臣意以為自盡之喪固不可不熟講得為而不為不得為而為之均於失禮故觸冒時諱有懷必達而衆怒齊發至以迎合邪論等語踐踏醜詆任其快意設使臣言不中惟當執兩端而折衷務合於是非之公不當遽加訾謗以為箝制人言之計也今之朝廷實以 殿下為為人後乎既非為人後則今日之禮寧免論議之不一乎臣平生險厄被人詆謗不可殫記或目之以狂直或目之以愚妄而惟迎合二字未嘗加之身上不圖今日又遭如此罔測之言無非臣之乏而不退老而不死之罪也更有何心舉頭人間請命鐫削以謝公議 荅曰以卿忠貞反被情外之斥予亦歎焉卿勿控辭速出行公○夜乾方巽方南方有氣如火光○己亥禮曹啓曰發引時自 上闕門內哭送之意臣等再三啓稟而 聖批終不允許臣等固知 聖上誠孝出天送終之禮豈有極哉第以舊例雖 大王王后喪皆行於闕門內誠以人君